

四庫全書

集部

欽定四庫全書

集部

富山遺稿卷一

一至三

詳校官庶吉士_臣李如筠

主事_臣呂雲棟覆勘

總校官檢討_臣何思鈞

校對官中書_臣張燾

謄錄監生_臣黃佑

欽定四庫全書

集部四

富山遺稿

別集類三 宋

提要

臣等謹按富山遺稿十卷宋方夔撰夔一名一夔字時佐淳安人生於宋季嘗從何夢桂游攻舉子業不利於有司退隱富山之麓扁其堂曰綠綺授徒講學其間自號知非子嘗著漢論十卷富山懶稿三十卷行於世其後刊

板散佚裔孫世德等復哀集其詩輯為是編
夔學有原本人品亦極高邁商輅嘗稱其詩
紆徐渾厚弗事雕琢可見其沖雅之操周瑄
亦稱其發之聲律不為體裁音節之所拘蓋
夔遇興揮毫所作頗乏研鍊之功故輅等云
然要其情致纏綿機趣自足五言一體氣勢
蒼莽尤較勝於七言淳安方氏自北宋以來
如殿中丞仲謀通判元修右文殿修撰閻太

僕少卿聞等皆擅詩名為時所稱許今其集
雖已亡佚而流風餘韻沾丐後人知其濡染
固有自矣乾隆四十六年三月恭校上

總纂官

臣紀昀

臣陸錫熊

臣孫士毅

總校官

臣

陸費墀

原序

富山遺藁淳安方先生一夔公所著詩也先生生宋元間天資穎悟志學懇篤嘗從遊潛齋何先生究心義理之學仕既勿顯因退而築室富山之麓授徒講學學者稱之曰富山先生今所遺詩多五七言古體紆徐渾厚弗事雕琢要其學有源委然亦足以觀先生沖雅之操矣昔歐陽文忠公謂詩人多窮非詩能窮人殆窮而後工世以為名言先生惟弗大用故事業無所見有蘊於

中皆於詩發之豈非窮而後工者耶先生五世孫文傑
彙輯將鋟梓以傳屬予一言未及答適文傑之子中領
鄉薦來京復介宗人兵科給事中廷臣促予言敬為書
此先生詩予友周弘璧言之備矣覽者當有得也商輅
序

欽定四庫全書

富山遺稿卷一

宋 方夔 撰

五言古詩

古意四首

其一

龍文雙寶劍誰鑄吳山英秋水光的皜俯視千金輕猶
餘報仇血白帝金天精百用不缺折潛鋒理故城芒角

不可掩氣衝牛斗星卓哉兩達士一旦出幽冥顯晦各有數飛沈兩無情孤雄顧其雌玉匣時悲鳴吳楚隔千里滄波會神靈一體互分合變化不暫停悠悠劍津水早暮風雲生

其二

陽聲鼓羣動更變無停機至人奪造化假合出範圍渭川起老龍一龍不得隨化為百尺竹玉立青差差仙人去市門三年願相依金丹遲不就失路將安歸臨分投

之杖平地去如飛還家尚肉眼棄擲不復持回首失蹤
跡飛騰息天池惟餘萬叢玉年年長新枝猶疑風雨夜
回龍嘯空陂

其三

秦皇滅諸儒若人媚幽獨偶來得名山依山結茅屋希
聲陶淳風無意蘄絕俗兒孫日以遠幾見碧桃熟漁郎
從何來延緣寒溪綠茲遊窺天祕平生未經目頗見有
此容父老邀我宿清談略晉魏世路嗟翻覆淹留信可

樂離念苦羈束幡然理回棹瑟瑟風吹足往來記行迹
溪路三四曲機心不自悶何事驚麋鹿回首不逢人白
雲渺空谷

其四

遼海有黃鶴翛然出塵姿結巢青松頂百丈無柯枝磐
石護其卵清露哺其兒一朝羽翼成丹霄恣遨嬉夕倦
宿月窟朝飢飲瑤池升高忽反顧昔是今已非歸來三
歎息塵俗無由知焉能與衆鳥碎啄隨雄雌欲語不可

了復作摩天飛仰望邈不及千載留餘悲

予讀書之室先從兄時南嘗扁以綠猗今二十餘
年矣感歎存歿遂成長篇

我我高山東迢迢青溪曲采蘅擷薜荔結構蝸牛屋中
有讀書堂堂外萬脩竹錯出泉石間脩然隔塵俗勁剛
逢干節空洞夷齊腹長釣橫江鯨翠立摩天鵠借問主
人誰彼美清如玉瓶罌空四壁簡冊富萬軸小篆揭新
扁高步踵前躅籜龍忽變化遺歌焉忍續歲晚坐相向

此君幸予辱榮悴紛變態風雨寒暄燠春來枝葉蕃蒼
璆森在目勢且干青雲肯顧凡草木憐渠痛灑掃日哦
三四幅吾詩試評品千古配淇澳

富山泉

先故居此山兩翁各嬋媽少翁復北徙宅廢餘此泉翁
死且求飲他水輒棄捐試以真水往一杯同蛻蟬兩翁
不可見久矣為飛仙澤餘有盡世泉流無竭年耜巖少
翁後往歲勘丹鉛倚徙感陳迹瘦蛟落長牋邇來絕妙

語此意誰能傳
豈知援溺手
鐵石新磨鐫
嗟予世味薄
飲水拋葷羶
時時汲脩綆
洗眼看殘編

上按察胡大使

我生苦不早
已後朱紫陽
居近世未遠
頗亦承餘光
恭惟紫陽翁
派接周程張
實學有實用
為世作舟航
古人不可見
來者猶有望
紫山豪傑士
理學望北方
帝憂浙右民
煩公持臺綱
吾道無南北
得志同濟量
我亦忝諸生
得升繡衣堂
厥今民凋瘵
如疾居膏肓
棄捐不自保

況復有蓄藏吏貪不加恤乘時肆敢攘願公活斯民風俗還虞唐

賀寺簿先生入新居

紫陽從西來孤峯望吳越自昔有佳人高蹈造理窟雄山走其下清淑鬱未發吾宗紫陽居秀挺鸞鳳骨家學印大程南北斗柄揭邇來卜新居住佳氣渺蔥鬱天香生桂蘭野性老薇蕨嬉遊獨樂園翛然立清絕我來坐庭隅幽草澹風月圖書有真趣為指掌中訣

牧牛

我有折角牛放在前山麓山瘦石稜稜歲月老穀觶摻
摻過百指仰此種田穀短笛卧斜陽我飯何時足

知幾

利欲沈着人猶如膠漆盤誰能逝不濯背走急水灘仕
宦豈不好惟有知幾難西風動歸興至今數張翰

讀李翰林詩

喜詩如喜酒舉世流饒涎問酒有何好妙處竟不傳古

人日已遠絕響三百篇後來誰措手諷詠皆陳編自從
騷選起衆作同蟲蟬憲章日淪喪變滅成飛烟翰林非
世人金晶應星躔手弄玉帝旂墮作詩酒仙行跡老屐
齒俠氣餘龍泉淋漓灑醉墨妙語窮真筌信手拈斧斤
一揮中方圓彼哉夸奪子駭汗莫敢肩玉堂不能留飄
落南海邊從此誇汗漫一往五百年生平尚邱壑夢想
岷峩巔慙君贈醉侯我飲不滴涓我詩如我飲撫頂期
相怜莫乞飛霞佩學舉白玉盤

九日讀陶淵明詩

晉有靖節翁古昔稱高士自陳簪組後為義不兩仕雖
乏報韓功深懷帝秦恥拂衣歸故園寒菊被栗里醉餘
灑新詩題自庚子始托此明大閑言外有餘旨我生後
千歲歷十五庚子區區一垤中起滅紛未已壯夫感頽
光大運悲逝水登高極遐想舒卷寓至理風期渺相接
衰暮竟誰似酌泉薦芳馨茫茫九泉起

夜坐閱書

賈不至千萬仕不至萬石時窮兩不遂衰髯秋蕭瑟平生用力處文字派六籍胸中萬斛泉老不出涓滴丈夫處世間志願何時畢抱此無用物價重連城壁蛟龍死泥沙蟠屈留遺跡政使傳後人虛名復何益

寄題吳愛菊

淵明歸故園心與境俱會種菊滿東籬高致在菊外故人絕世好尚友渺千載幽賞屬同流更有心期在

古意

子房英特人易老窮根柢縱橫出妙用萬變不離體當
其報秦時家難不顧弟揮槌擣祖龍結客自燕薊天地
為震動此身一稊米秦亡志雖酬韓破顏仍泚來謁龍
準公投機類天啓中原紛戰爭兩強力難觝雍容談笑
間國恥竟刷洗舊君有反服臣子獲盡禮雄心就斂退
勲業猶唾涕仙人在何許高步凌北濟壑松作糗糧煮
石當酒醴千載邈高風仰望首重稽

郡人有朱買臣嚴子陵按史傳買臣吳人嘗出為

會稽太守名曰鄉郡會稽蓋今兩浙之地吾郡
特以去州二十里曰朱池為買臣昔居之地難
以致見其實子陵晚耕於富春山中則今釣臺
是也二公出處不同心事亦異姑以其同為郡
人各賦一首使九原有作不悵來者之不我知
也

魯不識仲尼妄謂東家氏知音古為難而況諧俗耳寒
松翳遺貌弔古獨倚徙歌聲餘老樵昔居竟誰是當年

翁子貧賣薪沽酒市一朝入漢庭歟作青雲士出領虎
符貴牛酒賀閭里邸間綬若若差排庭中吏旁人自送
迎我亦附長史片言負茂陵奇禍竟博死窮通有定分
何足計戚喜豆羹輒動色未可欺妻子阿婦非棄翁頗
亦窺見此後車且恥載誰肯並廟祀

又

舟行徵君里步登徵君山雪瀨救我齒玉泉洗我肝遐
想臺上人披裘曳漁竿去齊復適吳來往浮雲間一釣

得文叔客星照林壑再釣得小苑高風凜祠壇古人邈
不及絕俗為甚難一時尚奇怪千載起懦頑我歌小招
詞公來顏不歡長嘯震冥杳載月下前灘

昌陽

昌陽十二節苒苒碧且鮮不堪置几案拳石留餘妍托
根寄幽絕篋在荒山巔不矚婦女盼不聞雞犬喧水石
相依附花開已千年一朝服食成肌骨翔飛鳶我欲啜
此草隱訣無由傳逝將涉浩蕩相期十洲仙

詠史

代馬必死戰韓盧必死獵萬族雖有殊受性固莫奪君
看伏波翁心火老不滅萬里戰壺頭赤手擁馬鬣前言
一朝酬英氣半途折海南紀銅柱城西埋石絕所以高
世人甘守田園拙梧楸老歸夢桑梓借餘熱人生貴適
意似用生分別為問澤車乘何如水鳶跼

早行

出門挂襪被客路寒溪早團團霧中日淡月隱林梢村

巷驅飢牛楓林度飛鳥山行未十里佳處輒藉草道逢
青衿生肝膽總傾倒分手各東西蘋花風嫋嫋

晚坐有感

青山圍四旁南斷如金玦殘霞映寒碧杳杳鳥孤沒我
本忘機人忽忽老歲月身係三家村心到極窮髮蕭然
病脚僧丈室坐說法事業誰做盡堯舜行不徹義理誰
說盡孔孟引不發有心阻世用自來同一轍人生直如
寄世路會有役何時拂衣去結筏造溟渤

黃楊

萬物具生理日與化工運黃楊性獨殊一歲長一寸氣
機有時歇厄會屢遭閏豈無土壤培亦有雨露潤爾壽
傳雲仍爾木僅尋仞老氏損成益顏子退為進至人妙
觀物此理如符印

竹夫人

殘陽未斂戍中夜苦無奈瞋膚跳蚤行掠面飛蚊過玲
瓏織翠縷有來饋一箇不惟供夜直亦可專房卧此君

丈夫心節操抱寒餓未免斤斧傷復受巾幘浣我老乏
風情偃息便慵惰不令魁梧人化作兒女悞

雁奴

雁落常水宿奴輒警暗晦已逸渠處勞禍患出恩愛老
漁窮意巧半夜弄光怪奴亟告其羣舉羣驚相戒漁火
不時明奴告不息喙衆方恬夢寐不悟伏機械一夕雖
屢驚四顧無已害利觜叢之身尤恐奴相賣漁者乘其
驚尺箠盡同隊辱令孟堅死依勢博陸敗小忠悞平昔

今日復何悔

前梁父吟

朝趨梁父岑暮投梁父麓左肩抱長攬右手牽黃犢禾
生亘原隰生計自為足罷耕還讀書何必事精熟茫茫
萬古墳苞括納心曲琅山藹空青溜水漲寒綠嗟我七
尺軀披雲卧幽獨抱膝一長吟清響振空谷

後梁父吟

我生在猷畝志願向此畢糲飯為我糧醜女為我室英

英帝家胄屢駕疑蓬華片言誤相酬攬我手不釋立談
秦吳兒再戰走漢賊托孤赴永安仗鉞駐渭北人生盛
意氣事會靡終極桑株渺何許歲月去如擲朗然舒卷
心始末本無隔

偶閱淵明開歲古詩因和其韻

開歲脩五十陶翁感浮休我生苦後陶夜夢從之游大
塊無停機歲月去如流棄家客東安泛泛雙浮鷗羲軒
古主人中古稱旦丘大倫具五常大法列九疇寥寥向

千載孤唱絕衆酬藐然愧前哲中路肯止不逝言晚聞
道惻惻懷長憂廓落八紘內俛仰吾何求

別洪復翁

十載與君友何曾異悲歡憂寒夜同袍念飢日同餐晚
節各大繆濁世多波瀾我爭東山墩君赴金沙灘雲萍
不相接我窮君長歎出門重入門轉覺營生難故人贈
尺書招我來東安水雲三百里飛鴻集江磐君如跨海
鵬發軔騫脩翰咫尺視萬里歸沂天池湍梅花點飛雪

相將理征鞍新詩月幾首願寄青琅玕

葛溪浴丹泉

杉松翳蒼翠古寺依寒溪小橋度空濶勝事窮朝隣仙
人渺何許昔年此孤棲丹成餘此泉高步凌雲梯至今
浴丹處精光貫虹霓老仙不厭世寄跡隨東西當時不
相顧野鶴羣鳬雞一朝上寥廓指爪留沙泥我生曠劫
內臨老歸途迷猶疑丹在水清嚙分刀圭

和淵明雜詩奈何五十年韻

我生未為後議論頗自喜讀書見古人慷慨欲立事既壯涉憂患輾轉不如意五十今到門翻與窮鬼值老馬但垂頭不似新駒駛前途勿復道有酒且勤置

比來東安以歡字十二韻別復翁寄有和章送別
今再和答之

我攜無言子東去頗不歡故人日已遠嘿嘿寢與餐寄洪樂山水岡巒湧濤瀾有時戲吟詩音韻搖風灘朋儕相徵逐歌笑雜悲歎朝吳暮過楚千里不憚難功成早

歟退騎鶴伴子安下視地上友俛首依江磐低飛不能
起俯借摩天翰我老涉世患衰懦心不滿從君上寥廓
永謝輿與鞍歸來不空手玄圃收明玕

詩人詠鴟夷西子之事多矣按越敗於魯哀公元
年想鴟夷五餌之策必其時也至哀公二十二
年越滅吳西子復歸計其年亦老矣豈鴟夷如
洛陽賈人不能忘情於舊約耶

去時苧蘿山送我搏黍叫歸時苧蘿山迎我桃花笑一

別二十年過眼如風燎人生重後會世事中前料未驚
馬齒長猶喜雞皮少功名志已酬富貴頭終掉傍君鷗
夷漿舞我烏棲調撫景惜餘年烟波老漁釣

古意六首

其一

老樵腰短斧鋤來此山中林深絕人跡邂逅兩老翁石
上安碁局零落歸飛鴻置斧偶坐睨終竟誰雌雄低頭
欲借問冉冉巢雲松索寞下山去樹杪餘殘紅不知歲

月遠但見邑屋空神仙在何處只與人世同眼淨偶自
見心到遙相通片時處仙境百年坐春風區區笑劉呂
安覓蓬萊宮

其二

誰斧若木枝銅幹蒼玉葉年年來滄波疑與溟渤接戲
攜赤玉舄跨此寒崖葉飄然造殊庭不用維與楫浩浩
吹天風涼氣入衣袂拍浮天漢濱匏瓜芒燿燿黃牛不
服箱放繩掉長鬣素娥不織裳拋梭理香頰千年蒼蘚

痕機杼空妥帖疑是媧皇土藏去壓歸篋歸來不知處
滿目迷空堞惟有賣卜人知向天根躡

其三

翩翩南昌尉來自九江西天關列虎豹欲進無階梯臣
有治安策不忍死窮棲浮浮山林氣披褐朝金闥上言
訐貴戚下言憫羣黎肉食久喑默狂叫發草藜臣言可
采擇寸刀剗鯨鯢一再不合意反旆風淒淒君網隊不
振况復子與妻自諧塵外約東遊隱會稽

其四

武夷千餘仞山上巢羣仙曾遊析木津醉墮白玉船其
下誰換骨潤州小嬋娟烟烟玉蓮鎖棲之此山顛丹砂
一點染靈化誰控搏塵根洗不盡展轉來凡間從言一
念失巫山渺雲烟徒然八十返空度三千年

其五

牧牛長得嬉牧馬長得騎惟有牧羊苦奔走脚脫皮道
人不我惜令作牧羊兒我羊數萬頭豈不為渴飢食草

百步間寒碧萋萋少許自為足不慕飽與肥羊眠即
化石羊行不跳籬竟日卧松下誰知藉金閨紫烟橫石
室兄來莫相疑

其六

博浪不成功偶此脫民籍客從何方來年紀約五百相
逢昧平生視我猶廝役知是羲皇人來去了無跡神機
不忍閔袖有青囊冊讀之盡綠字歷歷幕中畫十年風
塵中談笑等兒劇清濁同一源凡聖本無隔願言邈清

風歸來抱山石

田家四事

耕

古人以農仕仕即為公卿未仕有常業安得不躬耕我
耕常及時破塊當初晴墾壚土性異勤怠人力并泥塗
於手足霧露沾裳纓婦子挈午餉勞苦寬我情罷耕亟
放牧吾牛亦飢鳴投耒重回首深山空月明

種

我生古揚州田下異梁雍山田種荒菜水田種浮葑地
力肥瘦兼農器有無共及時撒新穀搏黍遞幽哢生意
日夜長移秧趁芒種未嫌豚酒祝自樂雞黍供落日竹
枝歌猶是幽原頌

耘

良苗已入土田間水沄沄昨夜苗根發翳葉如烟雲草
生害我苗匝月一再耘是時人苦熱出門天未昕鬱蒸
體流膏爬梓手生皸手荼擁根節腰草驅蠅蚊青青衿

佩子從事哀我勤哀我勤自樂爾非沮溺羣

穫

涼風入衣襟斜日照墟落我稼將登場杵聲橐橐宵
征備寇盜日行呀鼠雀腰鎌赴田間是處竟秋穫刈疾
笑翁健負重慚兒弱山炊雜戎菽野草配場藿人生累
衣食計較一餉樂已矣復何言吾生老耕鑿

喜雨

去年稻田荒七月青蟲起今年七月雨稻田盈尺水人

生會有涯飢飽互煎煮造物如狙公顛倒生嗔喜我岑
枯槁人未脫烟火味試問河豚羹何如江鱸美

富山遺稿卷一

欽定四庫全書

富山遺稿卷二

宋 方夔 撰

五言古詩

予家窗外種竹逾千箇每開窗輒相對終日今歲
館前亦多竹遂賦一首

五年慣在家貧賤自稱好飢鷹空護巢疲馬長戀藁森
蔭萬脩竹自喜結交早旦暮從渠遊不恨兩枯槁今年

出山去敗鼓費擊考此君不我嫌到處愜懷抱脩然書
齋下粉黛間新老相看便歌詠物外恣探討此生一過
客去住何足道竹下有石交歸來薙幽草

詠史

李陵

都尉出塞北全軍戰沒稽喊聲春霆震殺氣陰雲低單
于不相識借問將軍誰將軍本將種氏族派隴西天明
鼓音死劍斬軍士妻塵沙昏白日道路東西迷馬蹄去

不返邊草空萋萋高堂視白髮到死長悲啼歸期日復
日老病天一涯可憐龍門翁空作無陰兒

蘇武

中郎出玉門蕩節照絕域使指未分明奇禍誰能測劍
鈍割不深一朝來海北霜風入氍毹冰雪凍服匿老羴
石女兒歲久無出息遣來小居次無何乳通國古人凜
垂戒男女及飲食多少英雄人此心滅不得萬里十九
年費盡一生力歸來麒麟中愁絕遠山色

邵平

故侯學種瓜衰榮互相代隨時改門戶不改獨心在中
原方起事未有山西對不藉芒碭雲遠激浙江匪非關
揀點人自為非主吠蹉跎志不就去住無留碍晚入丞
相閣不墮籠絡內片言中臣主顛倒窮百態除却下邳
侯漢庭無此輩

謝安

安石在東山豈是無心者投跡高隱中妓樂妙陶寫功

成間管蔡灑泣悲用舍乃知富貴人此心未脫灑

楊惲

請君邯鄲舞聽我弘農曲本是田家人誤竊封侯祿貴
盛難久居終然手反覆南山有舊業披榛撒戎菽苗稀
草荒穢欲鋤力不足歸來日已夕一醉酒新熟歌罷即
長眠悲苦過於哭

感興二十七首

其一

斑斑林中雉雄伺朝暉鼓翅飛不遠山田麥苗肥飲
啄百步間未暮相隨歸當春哺羣雛長大各自飛宇宙
豈不大嗟爾為生微窮途守一轍畢命芝與薇

其二

婉婉馬上女兩頰瑩寒玉弓彎敲鐙踏側立紛相逐借
問誰家兒近出常山族兒家昔鼎貴煌煌什朱轂父親
守常山忽值邊馬蹙起義功不成巢傾卵亦覆妾身轉
流落歲久無錢贖欲去無緣由安得南飛鵠

其三

死時鮑魚臭生時椒蘭芬好惡相補報不及寸與分當
其得勢時六合旁無人侯邦盡夷滅邊馬亦逡巡豈知
驪山下金棺化灰塵所以楊王孫自與木石親累累三
尺土悠悠百年身

其四

去年春花少開晚不及時今年花開早滿樹紅離披多
花豈不好中有枯死枝夏潦則秋旱物理有盈虧鬱鬱

松與柏收斂含華滋嚴霜歲欲暮蒼翠無時衰

其五

朱樓遠迢遞繚以十里牆浮雲隱華桷夾路翳杉篁山
河未曾改世事不可量往者邊馬來主人意蒼黃半死
半脫走兒女不及將朝為綺羅叢暮作瓦礫場近傳有
其妾託身于襄陽一男作酒保相望居河梁骨肉各分
別中原渺茫茫浮雲何足羨俛仰悲荒涼

其六

陰陽轉兩輪五氣扇雙磨有生寓寰中濛濛如噴唾魚
鳥各飛沈梧棘稱小大多婦彭祖壽立善夷齊餓衆星
欲西行勁風牽以左蒼蒼望北極天命知何奈

其七

松柏生高岡藤蘿托臭味結交青雲上緩急不相棄生
平尚然諾彷彿杜穉季出入王侯門平地生翼翅兩都
尚勲階五管盛聲利朝挾尺書去滿紙一署字贈我千
黃金揮斥猶涕淚兒女憐賤貧誰知丈夫志

其八

種竹依遠林風急杪不折同根有榮枯枯枝先斷截茫
茫天壤間小大各糾結惟人具知識兄弟況同血一居
卿相位僕妾借餘熱升沈各為謀滴水不通洩人生骨
肉親富貴猶一呷丈夫屬有思莫笑袁劉拙

其九

浙江萬里浪杳杳來夾碣倒流趨海門震薄魚龍窟
舟何處來隨潮出復沒眩眼方搖搖歛至如飛鶻水天

萍無際雷風互飛發寄身波濤中性命危一髮寄語弄
潮兒昨夜缺完月

其十

轉丸有餘巧物莫如蛞蝓置身糞壤中不復知臭香兒
女苦貧賤自愛錢滿牀丈夫意見別胡為死排牆人心
最靈智自合知短長清濁雖異趣均墮聲利場為善與
為利相去爭毫芒不見舜與跖雞鳴辨存亡

其十一

舊籍占東南相去天一握曩聞大瀛海出縮幾蝸角欲
說耳目隘欲涉關河邈離合自有時甫見一南北逝將
擺世事羽化騎鸞驚朝行過夷門暮去宿易涿三晉多
權謀鄒魯守經學人生出與處相逢飽商確棄捐何足
惜無為悞奇璞

其十二

朝登北印坂暮抵樂遊原燐火翳復吐髑髏夜呼冤不
見昔時主但見陵與園銀鳧已羽化石馬猶草根向來

爭天子一口吞乾坤誰知百年後不免遭樊溫寶玉頻
發掘朽骨無精魂景昭去何處芳草悲顏垣縣官供衣
食當時多子孫

其十三

月府有奇木根幹飽清露生香異凡間衝風落天路高
枝舞青鸞低枝弄霜兔姮娥方妙年衣采純純素娉婷
不肯嫁含情待誰訴昨與汗漫期徑向銀河渡授我不
死藥倚徙怨遲暮即席欲服食終夕愁相誤悠悠下高

寒回首空烟霧

其十四

南國有美人
紉素閨清艷
房櫳淒冷風孤釭
颯寒皎抱琴鼓
黃鍾盎盎牛鳴
塹一彈春岫妍
再鼓秋波灑却立
步蒼茫
嘿嘿有何念
秋夜不肯明
霜露畏點染
獨宿守空帷
寸抱耿霜劍

其十五

石蘭媚幽姿
叢生在空谷
霜雪凍不死
寒碧秋更綠
結

交薇巖中疇昔傍人屋山行偶見之采采不盈掬歲久
未消歇懷袖自清馥我欲寫君心寄以孤生木必有非
耳人聽此無譜曲

其十六

天陽居盛夏生長無時休熒惑欲何詣渴奔極炎洲老
龍恐枯死深潛閱陰幽攢峯擁凝碧玉鑑開寒眸神靈
護忙俗盤盂置鰓鰕雷公持玉斧天女挾行輶行雨豈
不苦蟬懶化癡牛煌煌飛電光上下窮其搜嗟龍獨何

避自愧乏世求變化付雛衆畢命歸寒湫

其十七

百年特生木堅骨餘蒼榦棄材偶見收奇製出野爨絙
以朱絲絃猗蘭度將半相思越關河安得見此衆悲來
不成調清響忽中斷沈吟卷羅衣終夕愁零亂明月照
空庭盈盈滿霄漢

其十八

雅道久絕響遺詩邈誰繼烈士死無意古風未淪替後

來何足道翕翕遂聲勢一朝有蹉跌鳥散魚深逝萬物
有殊性小大各為計松柏生高岡不肯附蘿薜世路不
可回吾自尋吾契

其十九

昔聞楚山人服毳而冠鶻危坐古松根不飢亦不渴顏
色白如玉千歲如電抹我行不憚遠晨去披衲褐平生
戀着心思愛資妙割開口諒來意丹鼎分圭撮相看語
未了冉冉翔木末歸來問故人雲山渺空濶

其二十

著籍占杜曲別業在臨淄雞號夜鐸靜汗血逐膏脂縱
橫一握算顛倒逢笑嬉舉俗以為妙紛紛盡愚痴不見
朱公子千里來相師偶然得我策治吳航妖姬祕此枕
中術若有千歲期大化常不偶日與人事移人事多乖
忤汝計不得施君看貨殖傳刀間有哀時

其二十一

冀北渥洼種墮地已汗血深目老奚奴日夜供剪刷一

朝混南朔馳道三丈濶道邊館候騎歷歷抵燕越吳兒
富金錢補買計家活牽來中程度火印死不減置之早
櫪中時彼芻與秣往來給官行飛去如電抹奔走皮骨
空不見淹歲月區區鹽車中莫笑駑馬劣

其二十二

萬山斗入處百獸家其間天寒橡栗富朝食暮未還不
知鵲與盧與之有何冤霜晨飽以飯獵夫亦加餐昨日
料蹄跡銀灣水猶渾解紲任所之理氣升岡巒忽然得

遺臭逐逐窮千山歸塗巖谷震倒掛九節斑
斑渾含喜欲舞明朝急輸官犬乎爾誠能終然死霜菅

其二十三

桓公讀古書慙其堂下斲呼來與之談妙手不可學人
生苦未悟發軔要切琢譬如搜海珍澄汰江河濁不辭
用力久奇寶收把握君為談空人皮毛俱解剥超遙不
二門機鋒森劍槩從渠透玄妙風影不可捉

其二十四

吾聞義軒時真淳初未散人人悟此理不用一言贊漂
流三季後前聖多憂患木鐸方大鳴音響惜中斷百家
自其後非是紛相難父子起爭端恨死呻吟緩秦人規
我隙行素俱灰炭讀律不讀書條貫毛髮亂嗟彼商顏
人坐不學城旦一曲紫芝歌應有三人歎

其二十五

雄蜂採花粉雌蜂銜花汁粉以作黃蠟汁以蒸白蜜不
辭盜我闕但規安我室吾窮還可忍歲歲看分出不見

岐周人先世但積德土地付獯狄自愛幽沮漆兒孫徧
天下魯衛鄆郕畢勿言天未定此理終可必

其二十六

屏前戲羣優黃冠與榛杖喜怒視朝暮弔慶隨俯仰不
知有線索但道多伎倆須臾屏後人掣去無影響人生
大化中天地一罨網紛紛聲利場舉世爭掉鞅此身歸
空虛身外計得喪我笑痴絕人長作去來想區區曹孟
德詭譎窮萬狀聞道西陵墳妓樂鬧黃壤

其二十七

我觀古人書得見千載上正閏互立論南北紛相謗自
從獲麟後法度久淪喪非是千萬端史筆不可仗我欲
作野史筆法師素王文章行誅賞約束歸至當其人負
吾誅勿謂已屬續書成不流傳則本留千嶂還有知我
人百世永相望

夜坐苦蚊

萬物有常理動息隨昏昕區區蟲豸中惡毒無如蚊云

是鬼母化佛語非傳聞喙尺利芒刺腰圍隱花紋飢尋
飛翅輕飽飲酖顏黥搏噬以自肥乘時鼓妖氛潛伏草
莽間窺伺日向曛須臾却四出攢集窮崖垠橫空聚復
散如布鵝鵲軍騰身飛猱捷發喊迅雷礮瞥然闖門戶
來者何續紛不但入翠幙偏工惱紅裙端坐缺隄障各
各磨牙齧血肉生咀嚼斑駁疥與皴如塗守宮血丹砂
服兼斤紈扇不住手搖動酸骨筋或時中指麾殷輪血
朱纁雖能殺一二未足空其羣有來効方略薙草收蘊

薰延燒煽烟焰殺氣凝陰雲羅空燐鴉隼搜野醢麇麇
醜類盡驅逐暫息苗與獠自從生盤古元氣日磔分有
生潰亂出甘苦更臭芬而我墮世味未能去羶葷天陽
爍六合慢膚似遭焚之蟲併搜攪入夜無一傾誰知有
制伏火攻策奇勲當如運魔法百匝不憚勤事會靡終
極來者徵吾文

重九前一日與何會卿諸友分韻得日字禁體用
字

人生多別愁日月去如擲飛鴻背朔雲老去猶旅食良
會不可常一歲四五日悠然千載上此願何時畢是時
屬秋季月魄如弦直倦翰縱橫飛暮景凝紺碧園英澹
寒芳貧女改顏色吐哉值茲辰僅隔風雨夕心賞了無
餘萬物空相逼勿歎客囊空冷面令渠赤

送月溪范景淳謁告寧母

小范湖海豪霜翮迥獨立詩名三十年卷軸森戢戢合
陪砥礪貢昱遙鷗鷺入蹉跎墮網羅取勢斜飛集栖栖

縣博士進退階伍什此來歎何晚風詩清可挹東安號
多士騷墨居諫給餘芳襲學子簪筆負箱笈先生隱講
幃淵源探軻伋詵詵懷楠材大匠總收拾我亦箇中人
奔走緣縷粒識字不多多炙竹槁無汁衰窮兩相值噓
呵借君濕親幃惻盤羞我志已不及是時秋向殘客路
西風急寒溪月正明歸曬舊簑笠

壽雲岫徐友謙

武林有雲岫上有方外士昔年謁秦皇渡海萬羅綺蛾

眉雖可憐颯若風過耳歸來但却掃隱見白雲裏舉案
偕逸妻應門付稚子野興老薇蕨天香茁蘭芷自云初
生時彷彿記癸巳今年值甲午六甲再輪起我來欲問
道浮榮如脫屣終年坐臯比如折當門齒仙人據槁梧
今昔一隱几憐我壯非少星霜後一紀石爐煉神丹願
留候薪水丹成遂仙去千歲一洗髓

徐友謙小築冒雨訪何通叟途中作

昔有王子猷連夜泝剡溪自要看雪月借人作標題與

君客異鄉咫尺隔東西良會不可數花時飲桃蹊俛仰
便陳迹霜葉颯已萋近來費要約尺書寄赫蹏天慳竟
未破霧雨猶溟迷此來有緣事小築喧拱枿請君堆壁
酒洗我流散泥

寄蒙泉王南叟

憶昔未識易來訪易祖師丹墨事點勘君時坐皐比轉
眼十五載君壯我已衰爾來各異縣漂泊寄一枝重趼
有問道未省官與私君處瀟灑地一掃千首詩風濤隔

浩渺相望如九疑寄音無家客為我問所思桑榆借餘
暖歸來定何時

夜夢入一市井中見有總角道人能相人者往來
熟視予久之其語不能記也因授予以一握算
籌謾記其事

雞鳴起羣蟄往來黑虬蟬似聞塵埃中亦有玉雪流夜
夢忽見之恍如雲夢州其人髻雙髻衣上百結裘知有
素李術精神寄雙眸語我我不解羅縷維與陬臨分忽

有贈付我一把籌振衣逐輕矯去去逝莫留飛空度杳
渺劃然墮巖幽我豈富貴人胡椒窮豆區長貧博長健
此理更王囚仙人去何許往往巢蒿邱俗緣幾時了約
我三千秋

續詠史二首

嚴君平

西蜀嚴夫子易老養高致日閱裁數人少取多論議初
不要贏餘未暮輒闕肆人知取人廉要之亦餘事假我

龜策業行我誨人意夫子不棄世誰言兩相棄

韓伯休

賣藥長安市古有韓伯休紛紛要諧價百喚不轉頭坐
令兒女覺暮去不稍留人生異鳥獸飲啄擇所求豈無
爪距才而要安籠囚貧賤亦有道不獨為身謀

次韻通甫贈別

借我折絃琴彈君不調曲此材從何來妙斲嶧陽木一
奏唱離鸞再和彈別鵠音響無人知清絕過如玉若人

太古民不肯墮塵俗寫興希夷前袖手澹無欲彼哉紈
袴兒下視等毛粟憐我來鄉村妙詩時往復相思隔碧
雲清嘯振幽谷老我空自憐賴君時擊觸知音古來稀
不數晉荀勗紛紛箏笛耳勿與相徵逐

寄呈何潛齋小有洞天

小有古洞天仙峯戴靈鰲何人失守衛飛去隨波濤竭
來文昌宮還作貴人牢貴人舊散仙稍厭官府勞悵然
念人世謫居領巖壑飢食柏樹子渴飲松枝醪涕唾視

金
卷二
勲業習氣餘詩騷我亦慕仙者何時脫羈絛終攜綠玉
杖東去訪盧敖

富山遺稿卷二

欽定四庫全書

富山遺稿卷三

宋 方夔 撰

五言古詩

續感興二十五首

其一

猛虎等百獸天賦與長雄
曼胡利秋戟隅目磨青銅
從知世路暗羣行各西東
吼地一長嘯颯颯來悲風
飢來



待人肉不數豹與熊肥領而黑喙不知是何蟲坐卧不
自防穴爾皮毛中爾虎雖云猛一旦皮骨空慎勿欺微
細即且制神龍

其二

惡木生高岡枝疎上指天雨露非有私蟠踞幾何年
子寢其下山鳥棲其巔匠石過不睨生理得自全皮為
野火燒根為螻蟻穿空中不足恃一朝踣而顛上有千
歲藤相依久纏綿樹猶不自保爾藤何足憐

其三

大塊無私運萬象同一陶及其成器時罅漏雜堅牢所以一世人長短紛馬毛窮或仁與善達或虐與饕共疑造物繆名利相煎熬人生有常理賦命安可逃為善不必疑禍福任所遭孰云漆園達夷跖均天弢見夷不見疇泰山等秋毫

其四

移根托西園桃李賞奇遇春妍雖可憐顏色悲中路奈

何窮巷士多被才華誤諸公謬愛客輪囷獲殊顧投分
未云深容易輸情慙恩光借春陽滋液荷凝露悠悠當
路塵素地輕點污歲暮抱棄捐君看囚山賦

其五

濁水豈無月水濁不受光君看此孤蟾出入天中央遍
滿千家門徘徊度迴廊由來誰分壁招我昏暗場空庭
澹相對湛湛肺肝涼浮雲絕點翳寶此光明王天高萬
籟寂參斗低復昂人生何時畢收拾還穹蒼

其六

銅駝向京洛千里牽雙輪分不埋荊棘去鄴復還秦自
辭秋風客不浪五百春悲歡與窮泰過眼如飛塵眷言
返桑梓茂陵翳荒榛憶昔禹鑄鼎羅縷九土珍猶嫌問
輕重推落泗水濱况爾不任重頑鈍磨不磷未知從此
去何時免漂淪勿歎流落苦渠更多聞人

其七

鴻鈞大氣力日夜轉範模賦予有定形不與萬變俱君

看三春時動植紛萬殊一氣自結束誰與施粉朱人生
況知識均此造化鑪豈是風火煽假合成形軀戀戀千
歲藥莽莽三生塗從渠夢幻論袖中得玄珠

其八

雲日半解駁東上雨中晴不知誰幻化倏然成氣形精
光錯異采勢且迫太清良苗不潤澤咫尺夷大明兒童
爭指目萬象俱晦冥須臾換光景變滅不暫停天運亘
終古百怪終無成吾欲乘清風再拜叩玄精

其九

二女灑竹淚盡是心中血精誠著於物千載猶不滅當
時從南巡豈少稷與契奈何比孤纍匍匐陽城謁皇英
獨何人風泉共幽咽可憐女子心慷慨男兒烈湘水流
不斷誰道恩情絕何時見歸來續君遠離別

其十

老火久斂戍蓐收令西方塵沙隨白日慘澹無晶光故
葉改顏色過雁新着行孤坐墜秋月寒燈颭空房悵然

盛時節開緘理衣裳芙蓉久當采浩蕩不可量芬芳易
消歇歲暮安得長母為守空死萬代同山岡

其十一

西遊歷劍閣寡僕敝輪鞅水餐掬哀湍林宿拾墜橡悲
風振古木猩鼯扶魍魎十步九詰盤奇險躋攀上擔囊
偶不意一跌墮萬丈岷峨渺何許注目極遐想窮年食
外方浮蹤任漂蕩何時御長風振足謝籠網不須計三
餐迎我歸蒼莽

其十二

黃鵠浴海水一舉凌紫埃長風九萬里正值天門開不
知食何食雲路方徘徊嗟我鴻雁侶避寒聲悲哀失身
墮泥滓腹背日摧頽城東極惡少挾彈巧相猜稻梁未
足溉雲雨何時來不希附脩翮有分終蒿萊

其十三

大化差不齊人事固多繆紛紛騁牙角日夜齧且鬪所
以椅桐中徘徊東孤味人情隨盛衰世途迭起仆天命

有定分氣數安能圓去去息吾駕西山老危岫

其十四

揚州舊服卉木綿白茸茸縷縷自余年紡績燈火中織
成一束素上有浴海鴻歲寒若可恃淒淒凜霜風昨夜
縣牒下頭綱出城東殷勤赴官急癰瘡免殷紅我寒那
可忍負此卒歲功不知落誰手輸入秦娥宮

其十五

瞿曇未生世摩詰果誰宗問答了不語不立文字工開

流蕩千古一雌和羣雄揮斤紛萬變動寂不離空鏡壞
光不滅迴轉如輪風有能詰其迹推入滉漾中以此連
環入合散常無窮愚者誘罪福高者超神通孔孟久不
作誰能掃其蹤

其十六

我賈賈日本挂席窮南海冰夷鬪蛟龍牙角吐光采血
人以宴娛窟宅一朝改赤手拾明月天幸獨我在歸赴
王侯需價直十百倍匹夫惜性命貪冒以賈罪歌笑履

波濤竟死復何悔

其十七

飄飄瑤臺雪沆瀣竹林露蕭然立高寒不受世滓汙采
芳拾三秀徘徊崑山路譬如漆園像華屋非其處誰能
使蹇修再拜扣情愫湘波日搖蕩去去悲遲暮

其十八

文章不用世毫端弄春妍滿聽疑可采躡空若浮烟君
尹西都日琅琅賈董篇如種田得穀如鑿井得泉子虛

與大人縹緲凌雲仙
蕩節病桑梓不置巢邊
爲問君取士意取士當
誰先勿取春華艷祇取
秋柏堅

其十九

化生如雀雉隨氣更變
易卵生如鵝鴨不交無
羽翼人死心不滅化作
秋柏實俄頃復爲人萬
化無終極莊周固嘗云
知命故不惑我生異草
木未可從橫直縱然反
常理一二於萬億種禾
不生豆此喻要嘿識

其二十

老氏嗇而生併力攻一境深入黑暗中杳杳無光景佛
氏定而死百動不離靜了了誰在眼莫掇水中影終然
歸空無用處各馳騁紛紛墮此中未悟此二柄漂流餘
千年誰能折鋒穎邈哉我前修忠信得要領

其二十一

匣空龍得偶厨封畫通神可憐種瓜客猶自標故秦當
時祖龍死逐鹿灞水春早飛將軍檄晚分丞相茵抵死
心不閒不顧芻狗陳陶朱去越後未肯休此身猶聞載

窈窕千金散賤貧何如白雲叟自與青山鄰十年一易
世眉目輒少嘖悠悠華山裏甘作騎驢人

其二十二

金陵舊長安譙郡今豐沛吳州對楚山二水相縈帶團
團清淮月久落青天外長江穴岷峨奔迫走吳會一朝
金翅飛萬丈鐵鎖碎列郡空峻嶒故國餘叢薈升高望
中原極目了河岱大運有奔淪興廢更百代客行秋風
早中路乏資貸歸尋舊簑笠獨釣吾邦瀨

其二十三

自從判清濁人文肇古義中間更百聖扶豎顛與衰孔
孟死不作千載無明師嗟此仁義路舉世爭背馳無人
障橫潰一朝墜民彝微言雖尚在駸駸化侏離斯文亘
萬古悠悠竟何之

其二十四

昔時累科舉讀書患不足天今予我暇有書真不讀煌
煌百聖心清徹寒泉玉遺澤存讀書浸作生民福靜觀

靈臺中萬象森在目天寒境自明欲淺機自觸斯文化
異端駸駸即深谷晞顏以自勵吾欲求之復

其二十五

驚禽營顆粒飛飛集邱隅遊子困行役十年落江湖煌
煌秦與洛運轉天下樞啓明曜東漢萬足爭奔趨豈無
爪距力逐利如孫吳得失昧前料青雲間泥塗天命有
厚薄定分不可踰歸來北山下俛仰收桑榆

過深浦羅給事隱舊居

給事三父子著籍古池陽販夫偶竒貨未暮來錢塘維
時漢運衰紫宸厭天狼長鯨沸河洛幅裂萬里疆惟子
曉大義白筆搖風霜願提十萬旅巢穴傾朱梁青雲不
假翼無路凌高翔其事竟無成青史垂芬芳中原轉莽
莽一垓爭侯王登高挾浮雲極目慘八荒遐想同心人
過君橋梓鄉徘徊扣牧子遺跡悲荒涼區區夏蟲知知
我於詩長豈知用心處流落不忘唐我欲傳高士置君
後柴桑含情苦搖蕩佇立蒼洲旁

次韻徐古泉雪岡見寄

掬泉陟雲亭撼桐欵石室桐以藥清羸泉以洗愴惻惟
昔有二君靳與世紛出我來泛滄溟幽巖傍歌側不如
峴山去行盡風沙磧交君父子間風儀宛如昔引坐讀
書巢呼酒軟我膝吟髭怒氣張笑眼寒光溢菜編如正
色

古泉有菜
堂藁見贈

澹然離薌澤別去不空手懷袖粲金碧笑
我頑魯胸孔竅暗如漆順塗詠其事搔癢發故疾閉門
課學子風雨隔十日蒼蒼喬木春杳杳碧雲夕相思托

空言各倚天一壁終攜赤藤杖相期訪仙釋

續評史二首

貴者不如賤桑麻鄙簪纓富者不如貧布荆勝珠瓊子
平悟損益持論悍且精併敵就一向力與世俗爭所以
昏嫁畢洗然外浮名投跡厓巖中便足了一身頽波不
可挽滔滔自東傾惟有吾由我去留聽從卿

右向子平

昔有嚴將軍積氣壯窮峽維時漢道季軀鯨潰河邾我

公弛長纓不閉蛇虎柙爾軍從何來兩強力相壓天未
厭亂離龍去留空匣區區報主情盟血不受軟笑談履
刀鋸性命輕一掐吾但戴吾頭卿自用卿法

右嚴顏

諸葛武侯

我從古人中不數管晏輩紛紛後春秋僅有孔明在伊
人層壑冰表裏絕疵類文章派萃巖氣節凌梁岱未把
渭上麾甘抱隆中耒維時太清暗芒炎亘彗字老瞞鬼

蜨雄濶步無留碍區區蜂與蟻應手鐵山碎陸城胄天
潢窮乏卓錫塊垂白氣不衰逝肯一寸退孔明托末契
一起鎮橫潰煌煌復讎義掀揭人心晦風雲兩飛揚眼
底無強對取分孫曹間隻手探懷內自堪托六尺不啻
才十倍暮年五丈師此舉不俟再中堅擁貔貅勢若決
瀦匯半道失良圖天理意茫昧彼哉髡鉗兒見雪空狂
吠是非付陳編清泉奉芳醕何時起九京六合需一溉
朗詠出師篇千載照肝肺

出塞行五首

其一

南方地卑濕北客畏蒸暑晨行螫齒露水宿射短矢秦
人發謫戍見行如弃市今古共一方今者不獨死穰穰
作家業鬼妾紛驅使鵠夷卵翼蕃小兒半高鼻元精穿
萬化蕩蕩不可恃

其二

出塞二千里平沙白如霜探兵失單于傳是左賢王泉

鳴金錯竿士氣慘不揚中軍一再鼓萬馬赴敵場名酋
不可得殺傷略相當縣鞍盡馘獲前驅橐駝羊幕府閱
五符半死半裏瘡天子不錄過猶侯水中鄉

其三

我本輕黠兒小少槿閭閻未知從軍苦悠悠赴沙瀚同
行五千人骸骨蓬麻亂中有脫死者人各鳥獸竄間懷
大將印辛苦生還漢包以襯甲綾來上長楊殿憐我不
負恩授印親書贊一來贖前過比再軍鋒冠

其四

主公再度遼油幢坐中堅憐我鳴吠豎出入後弑羈一朝霍家敗主公忝姻富貴既相關受禍其固然我時護屬國脫命來居延蹉跎偶不死彷彿三百年此來復何幸皓首朝中天昔日霍家事歷歷在眼前偶行平陽里細草空芊綿與卿等輩耳歲暮愁紅薦

其五

登高望西北里數逾五千誰言龍庭遠轉盼跨幽燕喊

聲振瓦石鬪志前旌旃足蹈猛虎尾手攬飢蛟涎富貴
自有命此身若浮烟古來功名士發跡昉窮邊不見小
盤龍兜鍪換貂蟬豈為章句儒白首埋陳編見嗤灰與
土黥死吹不然

雨

吾聞陰陽書夏忌甲子雨蠶死麥復苦果諧老農語人
生無賢愚擾擾同一字衣食固其端安可過取數哀哉
元相國胡椒滿倉庾區區口體計所費能幾許晴曦禦

朝寒野菜供晚茹君看此輩人政自有佳處

憶舍弟

衰世門戶單惟有子與我手足共一身右短固不可投
老得寡妻誰謂此計左鵲巢覆爾巢骨肉翻成禍知幾
苦不早漸理歸舟柁縣官不可入有理子亦頗自憐羽
翼低尺書忽遠墮兩年食奔走老蠶自纏裹相救在急
難寧能久安坐玄精有可倚矧此乃么麼

贈鶴峯楊提幹森富春人

功名真定免赤手誰搏控十載武陵春一餉揚州夢時
窮非我獨萬事付破甕猶有夙昔心耿耿滿空洞豪氣
輕元龍雄卞眇子貢夢池句逾勁賭墅機屢中我來客
東安兩載補缺空青山浩獨媚飛雲倦孤送翩翩老令
威霜翮頗驚衆憐我一客鳥鳴和鬧晴哢妙哉屠龍手
老去餘此弄三年逝相從不為千金痛浮跡寄閒適片
語折宣闕歸鞭定何時矯首躡飛鞚

再疊前韻別鶴峯

仙鶴來富春造次欲手控偶然留一呌喚醒千年夢興
來屢相過小醉側春甕笑談驚座人輸瀉無底洞森然
枯柏村曾伴揚州貢班門無弃物一睨果奇中當今構
廊廟況聞棟掇空行看飛騰去不待吹噓送我亦懶散
人箋註鄙玄衆向何寫懷抱清苦等吟哢詩來出其右
雲月困朝弄風簷數四讀愈我岑岑痛復作摩天飛不
關雞鶩關何時款君門共把果下鞿

猩猩

醉酒水鉤吻短屐木連瑣猩猩見且罵爾欲寢處我吾
屬從此逝相語此最叵行行指忽動念念願亦朵試來
衣食之危機忽交墮糟醕自熏煮繩索自纏裹獵者躡
其蹤羣隊相隨坐盛血亂殷紅剪髮供髭髻明知好是
餌不悟貪為禍君看得意處早轉潮頭舵

觀魚山黃公河海圖二首

黃河從天落北來受降城劃至韓城縣噴薄萬雷霆何
處雜泥滓濁濁不復清奔迫梁楚間赤子如浮萍近來

到淮泗烟波鼓長鯨無人起隄障何時返滄溟惜哉神
禹疏高下昧地形胡中倘可注曷不施經營

右河


逝川走東海日夜無休歇吐此盤中渦不長亦不竭日
月走中天於焉雙出沒駭浪掀扶胥高於朔山雪蠺蜃
吐樓臺蛟鼉護窟穴海若不徒夸馮夷甘受屈吾聞三
神山恍恍銀宮闕便隨長風去發軔首溟渤倘逢方平
生海底探明月坐待清淺時歸來未華髮

右海

將歸戲作此以別諸友

新都玻瓈江下會東陽派南圖侯扶搖東首掉澎湃千
峰白雲粘百道清泉灑仙室舊樵貧釣瀨老漁怪桐君
古仙居稚川昔高邁都忘語嘿殊未覺高下隘棲身傍
冷門吐口洗殘債針石遠相粘鹽卵危不壞露翰倦孤
飛金波炯三桂驚心歲月過眼風雨快感此桑扈鳴
春蠶續管蒹悠然耕田歌早秧補葵芥豈無田園念未

脫塵氛械去來久無書情愔不比畫自慙榱桷村曾螫
蟲虺蠱難將西山景少補東隅敗妻子累寒餓文字欺
聾聵未酬醉鄉封暫倒仙源界蕭散縱孤騫遊戲留一
慨他日對牀情為君作佳話



富山遺稿卷三

欽定四庫全書

集部

富山遺稿卷四至七

詳校官庶吉士_臣李如筠

主事_臣呂雲棟覆勘

總校官檢討_臣何思鈞

校對官中書_臣張燾

謄錄監生_臣黃佑

欽定四庫全書

富山遺稿卷四

五言古詩

藥圃五詠

藥中有杞菊甘食比蔬菜維昔陸與蘇賦詠窮梗概搜
尋入吾圃孤根擢荒穢未能竟俗好葺葺生意在辛美
滿袖衽枝葉不一采少需摘絳實疊疊貫珠琲歲晚脫

宋 方夔 撰

皮毛涼葉蘇渴肺靈龐守我宅無復逐夜吠

右杞菊

楚客賦夕餐經傳不著名野菊或殺人神農著醫經此
品甘且辛叢生數千莖分種不封囊移根或盆盛噉茶
摘其葉觴酒啜其英風霜振枯槁氣味老更成平生攻
苦淡矜此歲晚情不獨醒頭目吾其寄餘齡

右甘菊

白朮號山薑以西北為上近來出古潛何必論地望老

鴉銜子去往往生絕嶂歲久根株成細大極殊狀洗削
事煎烹補冷逐虛漲彼哉不好事蜜浸溢瓶盜游媚富
貴人遠作千里餉平生不為口我欲禦烟瘴

右白朮

芎苗高一丈細花如甲椒不獨服芎根衣佩或采苗清
芬襲肌骨歲久亦不消所以湘浦客潔修著高標我老
苦多病風寒首頻搖願移一百本溉根豁煩囂雖無下
女遺乾葉插盈腰逃泥貫旦暮不學楚人謠

右川芎

老松踰百圍名為棟梁材孤根雖故在不復萌條枚生
意無處泄浩浩還根莖結為千歲苓膚色狀瓊瑰洗曝
不遺力藥裏手自開羊棗出河北胡麻來天台蒸以白
砂蜜盛以紅瓷杯一朝服食盡玉色還嬰孩

右茯苓

宿前灣

夕行前溪灣翁嫗招我宿入門燈火鬧偶此寄一足客

囊喜清淨我倦睡頗熟回首失浮蹤終朝露如沐

上胡主簿愿宣城人

尹公起宣城謂是金閨彥失脚簿領叢斜飛集州縣南
陵粉榆地妙年試雄剌還將舊棠陰來作清溪掾近來
多政學誤製好東絹我公有淵源家學富經傳四明炯
清水玉映崑山片以茲撫凋瘵精神皎如練困倉出毫
末德化速郵傳到官未百日惻惻庭闈戀花外想安車
戲舞斑衣緣闕此壽斯民童髦劇歡忭我亦囿陶鈞有

道恥貧賤洗眼看政成攜上金鑾殿

乃岳既林翁
四明治中

問稼隱疾

日子來訪我話舊樂復樂中年情義深一別輒作惡子
我皆客居浮萍嘆流落傷心縮地術倒指賞月約雞黍
喜有期書久懶不作是時困着愚處處熬膏鑊而子金
石軀坐受貧鬼縛傳聞數日來卧病清風閣況子賢主
人苓朮富裝橐子亦屢折肱忍不急呼藥大患緣有身
此理直糟粕要令文殊師欲扣維摩諾人生餘幾許何

事紛六鑿殷懃今夜月為我照寂寞

寄友直借古書

五日學作詩十日學書紙書成自稱好對客發微泚爾
來草書人作態工側媚譬如老孫娘不病要兒齒我空
詩未工苦瘦如我字有詩使人寫適興聊爾爾宿緣喜
多學未用進於技試問宜休民何如覓青李

以白瓷為酒器中作覆杯狀復有小石人出沒其
中戲作以識其事

彼美白瓷盞規模來定州先生文字飲獨酌無獻酬
咄哉石女兒不作蛾眉羞憐我老寂寞赤手屢拍浮
子頑不乞火我醉不驚鷗無情兩相適付與逍遙遊

寄徐雪岡二首

我行其偶然觸石五溪渡歸迷日已暗有客相與晤
訢君相與問酒罷首東路坐恨此機失欲去翻疑悞

又

明庚共一天出沒巧相避與君別半載轉脚不相值
君

來過故人我復捨此去悵然起遐瞻雲歸水東逝

秋夜有感

西窗枕清溪流水日夜響孤眠夜無寐離夢苦搖蕩自
我辭家來弦月屢下上消息不曾真百念墮淠瀦憶昔

心氣雄躍躍盛年想窺竒故牧儲

溪堂先生曾任淮西漕其家多書

借

重宗橐賞山搜富金沙澤淤耀琨蕩天池塞孤飛

闕

山

紛獨往下視夸奪子蠓蟻鳴甕盎區區凡楚爭逐逐臧
穀網蹉跎改素標零落收宿莽平生矜與夸榮為謝外

獎惟餘不盡心耿耿猶疇曩譬如老獵獫聞呼齒足痒
清江三百里西風颯蕩蔣明朝沂歸舟鴉軋鳴雨漿

洪平齋有官舍見月三首與程楊二公又各次韻
中秋日休諸友用韻為戲奔逸絕塵之作未能
擬其萬一也

月行十三度晝夜風輪急不知誰鞭策行天出復沒我
欲訴清虛雲路九萬級梯颺空裊裊月走那可及願言
住仙府露重環佩濕將從匏瓜摘復結漢津汲相期無

情欲不灑孤眠泣落杵玄霜寒出削玉斧
澁笑我南飛鳥未辦一枝葺歸歟定驚魄
烟霧飽清吸

又

北極跳宜碣南瞻盡閩甌眇觀此瀛海浮
空竟千秋瑞光出冰輪千丈開雲頭月行
無厚薄不盡離人愁夜半北斗高闌干
壓幽州繁星見復沒如滓浮新筵庭虛步
清影梧桂聲颼颼舉杯飲未醕棹歌起
漁舟光景正清絕賓去我獨留飲技未必
奏頽然老伶優

又

憶昔戰秋闈不復返隻輪嗟此無用學棘猴費精神當時羞見月月豈欲負人我去月千里月來轉情親餘音唱窈窕小詩鬪清新團團桂樹影金粟香不陳便當結幽佩凌空訪仙真那知滿夜夜此去空塵塵翩然倚高寒不數肇與晨笑渠老章句步驟準過秦

次韻稼隱告歸

我觀大瀛海天水二清廓誰麾海若來樂鬪萬蛟鰐風

濤拍屯門潰作無底壑鬢鬣豎旂旛牙角利椎鑿血人
不肯吐安得留殘啄茫茫沂雲槎日夜失棲泊歸塗三
月糧囊底餘圭勺平生岸律氣磨淬去隅角案空螢已
乾匣閉龍不躍故衣粘蜃氣未洗瘴霧惡爾來出白雲
奔走亂車鐸有來證奇字時扣草玄閣高基固饒人欲
學苦無脚惟君桑梓英遇合長落落申旦首胥溪險韻
當離酌勿為松菊挽來占秋堂幕

贈心梅黃教諭

善範圍數

太玄八十一經世加一倍方圓起參兩奇耦常相配大
哉天壤間理大獨無對而數行其中往往不相背冥探
洞古今幽討極覆載吾求之瓦礫數亦無不在陰陽如
推車五氣如轉磴雖然霧與珠人物等唾欬惡或盜跖
壽善或伯夷餒人事非不明所值互吉悔長平四十萬
高下付一概誰尸造化筆一一難歸罪君言吾有數萬
竅均大塊試將握算推不出範圍內譬如埏埴人萬器
同一埤前陶或堅牢後陶或破碎中間又不同純駁千

萬態當時君與相比年有真宰黃蛇吞輿地或者非茫
昧八宮卦縱橫四柱數進退以此尺捶義合散無星礙
昔君雄少年盧雉唱好采失脚踏鶡冠漕闡雙奏凱爾
來相乘除得失賭一塞後夜北斗高燦燦綴小沫瑟縮
蛇入宇蹭蹬鵬運海栖栖百巧窮饒君三尺喙此來坐
臯比學子富衿佩喜持秘苑術遠與虛中輩諸公義財
澁枯槁喜一漑煩君測五緯出沒更明晦何時聚白羊
旦暮真可待

次韻王蒙泉見寄併和鄙作

君譜猗蘭操曲度得碩師孤唱絕衆和不與淫聲比難
逢猗石盛終作蹈海衰近傳貧作崇疽疣等駢枝西風
幾揮淚徙倚哀吾私好音忽西墮竹下哦君詩翛然落
月色融融伴君疑慙慙告司鼎君側要子思試歸扣小
有坐待天定時

送講書吳友直過吳門省兄

寒城十月交萬葉風蕭槭林幄變浮紅水鏡湛虛碧維

時子吳子驅車欲何適千里想萼羹去作水鄉客我非
萼羹客海嶠有凡伯譬如鷗與鴈形影困乖隔去鄉三
十載如浮家泛宅相思不即見歲歲累行役感此歲寒
情高歌慰離析看君乘長風健翮搏水擊

徐靜樂以賤生有詩次韻為謝

偉哉盤古靈萬仙集殊庭分布歲鎮熒生化與剋刑氣
機浩不停幾人得寧馨開落隨日莫嗟哉此三星光彩
浮四溟芽甲逢春霆鋸刃發霜硯蹉跎歎流萍白雲歸

杳冥十年哀伶俜賦茅由狙狴貧鬼急索絳碧梧墮倦
翎館我修遺經緬彼雙峽青易學驅沸闕出關東傳丁
渡海北返寧共君萬顏齡藥籠俱參苓

壽雲岫以所畫壽星為喻

吳山多金堂我來訪仙真神交若有契邂逅見主人浮
雲白步障老松青承塵從以香巖髻環以瓊樹春仙人
坐盤石杯勸三五巡果苞武陵秀木蕪占城珍幾見蓬
海沙不數上古椿問從何處來騎鹿來秋旻謂是老人

端游戲葛水濱容我野服見間簫西閣賓再拜上祝辭
慇懃寄千諄一祝等龜鶴再祝生麒麟語罷却復進聲
折問養神隨之上南極放牧雲漢津

偕教諭傅草堂黃心梅及諸兄遊賢明寺

朋儕久拘檢偶此陟翠微凌波渡野航踏雲扣小扉林
霜變紋纈拘月湛珠璣古寺半莓苔空堂盡蛭蟻持鉢
乞朝暮殘僧猶未歸清歌振冥杳善響聲轉希倦餘枕
木榻慮靜鷗不飛我亦嘿不語趺坐觀天機幽芳艷巖

菊暝色漏晴暉
趣行戲拍肩扶醉爭牽衣
鄧林蔭千里
飛栖偶相依
無人識幽趣
再鼓黃金徽

次韻沃梅泉見寄併見和鄙韻

我來沸鳴螭
坐閱寒蛩響
有興寄滄洲
逝欲窮浩蕩
百年如彎弧
落處分寸上
前途知幾許
乾坤一漉瀼
念子住沃洲
屢作扁舟想
杖屨縱勝游
文字醉清賞
竒音遇朗鑒
請我黃岡蕩
世氛久昏暗
有絮不能往
交情浮雲淡
樂意陽春盞
老鶴騫孤飛
況子開三網

謂稼隱解盟

離合

固其常豈是比土莽我亦屬同流始末藉虛獎永懷芳
蘭苔不肯間誰曩詩來森如束快讀劇爬癢吾詩非世
好一派分凡蔣君如領此言急浪盪飛漿

催雪

滕六避熱屬飛雪不到城人意逐高下造化亦世情桂
窻坐清曉青山灑寒霽巨松古鬚鬣老梅玉璫珩僅餘
小培塿固隴縱復橫其下數茅屋楫杌烟火明我興牛
背上披裘欲晨征作詩逼僵龍一夕紛瑤瓊

讀白樂天詩

淵明避俗士出語未必俗
衡口吐奇偉往往寫心腹
外韜中勁剛芒刃不堪觸
如渠不絃琴非絲亦非木
樂天後此翁逸駕追奔躅
未知溝中斷孰與朱與綠
吾觀外國風雅麗豈不足
自從受繩削稗語棄不錄
嗟彼千載人何但詩可續
誰能學柳下不受嫠也宿

揚子雲

兩都秦與洛派自赤帝精
譬如同根本南枯北猶榮
哀

哉千里草四百終火行窮新何為者欺孤易天明中間
十五載無汝元城名誰尸春秋筆恕彼投閣生當時有
凡例黨中獨垂情區區考亭叟再主斯文盟

代壽新城劉尹迪河南府人

峩峩嵩少精皎皎河洛秀東都誰經始多士傳自舊驛
騶冠冀北盡在伯樂廐於今雖應姓況我隆準胄金閨
集羣彥合伴鴛鴦筵隨風落東南州縣倦奔走王謝舊
江山屏幃列千岫公來長蓮幕同列得領袖慙山陰

叟多謝龐不嗾三年賀政成囊封飛剡奏胡為斬軒騰
未能脫墨綬居然寄百里芒炎應列宿東安杭屬邑民
俗朴且陋下車日無事餘力游膚腠朝廷重民社政自
不輕授沈沙珠吐光閉谷蘭騰臭天高元北極錫馬接
清晝森森琅玕姿錯落羣玉圓生賢造物意積善神明
佑百壺登公堂祝公南山壽

擬上徐容齋

我憶昔孺子獨以高士稱當時漢道季諸賢盡奔騰高

士卧不起玉壺湛清冰至今拜畫像遺芳暨玄曾先生
奮東魯鳬山立霜鷹行臺累分府螫蝓驅蚊蠅青溪古
巖色膏油沸如蒸猾吏溺死灰飢窮坐相仍此來獨何
晚三載欽風稜為回浙江水六合俱清澄

富山遺稿卷四